

每週經課朗誦經文(巴克禮漢羅/教羅)2013/03/17

共同經課 - 1 以賽亞書四十三章十六節~二十一節

16 耶和華 tī 大海中開路，tī 大水中開路；17 hō 車、馬、兵丁，勇猛 ê 人 lóng 出來；(in 做一下倒落去，boē koh 起來；in 滅無親像失去 ê 火；)18 耶和華 án-ni 講，Lín m̄-thang 記念前 ê 事，亦 m̄-thang 想早時 ê tai-chì。19 看 ah，我 beh 做一項新 ê 事，taⁿ teh 發現，lín kiám m̄ 知 mah？我 beh tī 曠野開道路，tī 沙漠開江河。20 山裡 ê 走獸 beh 尊重我，山狗 kap 駝鳥亦 beh án-ni；因為我 hō 曠野有水，hō 沙漠有河，thang hō 我 ê 百姓，我所揀 ê，lim。21 Chit-ê 百姓是我為 tiòh 家己所造 ê，beh 報揚我 ê 名聲。

共同經課 - 2 詩篇一百二十六篇

1 上崎 á ê 詩。1) 耶和華 chhoā hiah-ê 受掠 ê 人 tò-tng 來錫安； Hit 時咱親像眠夢。2 Hit 時咱 ê 嘴 hah-hah 笑，咱 ê 舌出大歡喜 ê 聲；外邦中就有人講，耶和華為 in 行大事。3 耶和華有為咱行大事，咱就歡喜。4 耶和華 ah，求你 hō 阮受掠 ê 人 tò-tng，親像南方 ê 溪水 koh láu。5 流目屎也種子 ê，Beh 出歡喜 ê 聲收割。6 Hit-ê 流目屎帶種子出去 ê，的確 beh 帶伊 ê 稻把歡歡喜喜 tò 來。

共同經課 - 3 腓立比書三章四 b 節~十四節

若別人掠做有 thang oá 靠肉體，我就 koh-khah 有。5 我第八日受割禮，是以色列族 ê 人，便雅憫 ê 支派，是希伯來人所生 ê 希伯來人，照律法就是法利賽人，6 照熱心就是 khún-tiòk 教會，照 tī 律法 ê 義就是無縫 thang 嫌。7 但是平素做我 ê 利益 ê，我為 tiòh 基督已經看伊做損害。8 M̄-nā án-ni，我真正看萬事做損害，因為我掠 bat 我 ê 主基督耶穌做第一好；我為 tiòh 伊 bat 損失一切，也看做糞埽，是 ài 得 tiòh 基督，9 來長長 tiàm-tī 伊，m̄ 是有家己 ê 義，出 tī 律法 ê，就是有 tùi 信基督 ê 義，上帝為 tiòh 信所賞賜 ê；10 hō 我 bat 伊，kap 伊 koh 活 ê 權能，以及有份伊 ê 受苦，來學伊 ê 死，11 看會得 thang 到 tī hit-ê tùi 死人中 ê koh 活。12 m̄ 是講我已經得 tiòh，á 是已經完全；獨獨走進前，看 oē-thang 得 tiòh 基督耶穌 ê 所以得 tiòh 我 ê。13 兄弟 ah，我無掠家己做已經得 tiòh；獨獨專務一項，就是 boē 記得後面 ê 事，致意頭前 ê 事，14 òng 所插 ê 標來走，到得 tiòh 上帝 tī 基督耶穌，tùi 頂面召咱 ê 賞。

共同經課 - 4 約翰福音十二章一節~八節

1 所以耶穌 tī poāⁿ 過節前六日到伯大尼，就是拉撒路所 toà ê 所在；伊是耶穌 tùi 死人中 hō 伊 koh 活 ê。2 In 就 tī hia 為 tiòh 耶穌備辦 ê-hng 頓；馬大 teh 伺候；拉撒路亦是同桌 ê 一個。3 馬利亞就 thèh 一斤極貴氣真 ê ná-tát 香油，抹耶穌 ê 腳，koh 用家己 ê 頭毛拭伊 ê 腳，香油 ê 芳滿厝。4 有伊 ê 學生一個，beh 賣伊 ê，就是加略人猶大，講，5 啥事 m̄ 將 chit-ê 膏油賣銀 á 三百個，來 hō sòng-hiong 人 ah？6 伊講 án-ni，m̄ 是因為伊關心 tī sòng-hiong 人；是因為伊是賊，koh 管錢袋偷 thèh 所 hē ê nā-tiāⁿ。7 耶穌就講，chhut-chāi 伊將 chit-ê 留 teh，到我埋葬 ê 日。8 因為常常有 sòng-hiong 人 kap lín tī-teh；但是我無常常 kap lín tī-teh。